


許州志

卷之九人物下



DS
793
H52H835
1838
v.9

許州志卷之九

直隸許州知州高安蕭元吉纂修

人物下

武功

忠烈

殉難

義行

隱逸

武功

西漢灌夫字仲儒潁陰人父張孟嘗爲潁陰侯灌陰
舍人得幸因進之至二千石故蒙灌氏姓爲灌孟
吳楚反時潁陰侯灌嬰爲將軍屬太尉請孟爲校
尉夫以千人與父俱孟年老潁陰侯強請之鬱鬱
不得意故戰常陷堅遂死吳軍中漢法父子俱有

死事得與喪歸夫不肯曰願取吳王若將軍頭以報父仇於是披甲持戟募壯士數千人及出壁門莫敢前獨兩人及從僕十餘騎馳入吳軍殺傷數十人不得前復還漢壁身中大創有良藥得不死少瘳復請將軍曰吾益知吳壁曲折請復往將軍壯而義之恐亡夫廼言太尉太尉召固止之吳軍破夫以此名聞天下武帝卽位徙夫爲淮陽太守入爲太僕家累數千萬食客日數十百人陂池田園宗族賓客爲權利橫潁川潁川兒歌之曰潁水

清灌氏寧潁水濁灌氏族至今有臺名思故在許城南二里許

韓延年潁川人父千秋封成安侯延年襲封以校尉隨李陵伐單于單于騎多戰一日數十合虜不利欲去會陵軍侯管敗亡降匈奴具言陵軍無後救射矢且盡單于使騎並攻漢軍漢士卒多死陵令軍士至遮虜鄣者相待夜半時擊鼓起士鼓不鳴陵與韓延年俱上馬壯士從者十餘人虜騎數千追之延年戰死

東漢王霸字元伯潁川潁陽人也世好文法父爲郡
決曹掾霸亦少爲獄吏常慷慨不樂吏職其父奇
之遣西學長安漢兵起光武過潁陽霸率賓客上
謁曰將軍興義兵竊不自知量貪慕威德願充行
伍光武曰夢想賢士共成功業豈有二哉遂從軍
破王尋王邑於昆陽還休鄉里及光武爲司隸校
尉道過潁陽霸請其父願從父曰吾老矣不任軍
旅汝往勉之霸從至洛陽及光武爲大司馬以霸
爲功曹令史從渡河北賓客從霸者數十人稍稍

引去光武謂霸曰潁川從我者皆逝而子獨畱努
力疾風知勁草及王郎起光武在薊郎移檄購光
武光武令霸至市中募人將以擊郎市人皆大笑
舉手擲揄之霸慙懣而退光武卽南馳至下曲陽
傳聞王郎兵在後從者皆恐及至滹沱河侯吏還
言河水流澌無船不可濟官屬大懼光武令霸往
視之霸恐驚衆欲且前阻水還卽詭曰冰堅可渡
官屬皆喜光武笑曰侯吏果妄語也遂前比至河
河冰亦合乃令霸護渡未畢數騎而冰解光武謂

霸曰安吾衆得濟免者卿之力也霸謝曰此明公至德神靈之祐雖武王白魚之應無以加此光武謂官屬曰王霸權以濟事殆天瑞也以爲軍正爵關內侯旣至信都發兵攻拔邯鄲霸追斬王郎得其璽綬封王鄉侯從平河北常與臧宮傅俊共營霸獨善撫士卒死者脫衣以斂之傷者躬親以養之光武卽位以霸曉兵愛士可獨任拜爲偏將軍并將臧宮傅俊兵而以宮俊爲騎都尉建武二年更封富波侯四年秋帝幸譙使霸與捕虜將軍馬

武東討周建於垂惠蘇茂將五校兵四千餘人救建而先遣精騎遮擊馬武兵糧武往救之建從城中出兵夾擊武武恃霸之援戰不甚力爲茂建所敗武軍奔過霸營大呼求救霸曰賊兵盛出必兩敗努力而已乃閉營堅壁軍吏皆爭之霸曰茂兵精銳其衆又多吾吏士心恐而捕虜與吾相持兩軍不一此敗道也今閉營固守示不相援賊必乘勝輕進捕虜無救其戰自倍如此茂衆疲勞吾乘其弊乃可尅也茂建果悉出攻武合戰良久霸軍

中壯士路濶等數十人斷髮請戰霸知士心銳乃
開營後出精騎襲其背茂建前後受敵驚亂敗走
霸武各歸營賊復聚挑戰霸堅卧不出方饗士作
倡樂茂兩射營中中霸前酒樽霸安坐不動軍吏
皆曰茂前日已破今易擊也霸曰不然蘇茂客兵
遠來糧食不足故數挑戰以徼一切之盛今閉營
休士所謂不戰而屈人之兵善之善者也茂建旣
不得戰乃引還營其夜建兄子誦反閉城拒之茂
建遁去誦以城降五年春帝使大中大夫持節拜

霸爲討虜將軍六年屯田新安八年屯田函谷關
擊滎陽中牟盜賊皆平之九年霸與吳漢及橫野
大將軍王常建義大將軍朱祐破姦將軍侯進等
五萬餘人擊盧芳將賈覽閔堪於高柳匈奴遣騎
助芳漢軍遇雨戰不利吳漢還洛陽令朱祐屯常
山王常屯涿郡侯進屯漁陽璽書拜霸上谷太守
屯兵如故捕擊胡虜無拘郡界明年霸復與吳漢
等四將軍六萬人出高柳擊賈覽詔霸與漁陽太
守陳訢將兵爲諸軍鋒匈奴左南將軍將數千騎

救覽霸等連戰於平城下破之追出塞斬首數百級霸及諸將還入雁門與驃騎大將軍杜茂會攻盧芳將尹由於崞繁峙不尅十三年增邑戶更封向侯是時盧芳與匈奴烏桓連兵寇盜尤數緣邊愁苦詔霸將弛刑徒六千餘人與杜茂合飛狐道堆石布土築起亭障自代至平城三百餘里凡與匈奴烏桓大小數十百戰頗識邊事數上書言宜與匈奴結和親又陳委輸可從溫水漕以省陸轉輸之勞事皆施行後南單于烏桓降服北邊無事

霸在上谷二十餘歲三十年定封淮陵侯永平二年以病免後數月卒子符嗣徙封軼侯符卒子度嗣度尚顯宗女俊儀長公主爲黃門郎度卒子歆嗣

傳俊字子衛襄城人光武徇襄城俊以縣亭長迎軍拜爲校尉累從征伐有功建武封昆陽侯尋拜積勞將軍卒諡威侯

堅鐔字子伋潁川襄城人爲郡縣吏世祖討河北或薦鐔者因得召見以其吏能署主簿又拜偏將

軍世祖卽位拜鐔揚化將軍封灃強侯與諸將攻洛陽而朱鮪別將守東城者爲反間私約鐔晨開上東門鐔與建義大將軍朱祐乘朝而入與朱鮪大戰武庫下殺傷甚衆至旦食乃罷朱鮪由是遂降鐔食蔬菜與士卒共勞苦每急輒先當矢石身被三創以此能全其衆及帝征南陽擊破訢奉以鐔爲左曹常從征伐六年定封合肥侯

晉鍾會字士季潁川長社人太傅繇少子也敏慧夙成及壯有才數技藝而博學精綜名理以夜續晝

由是獲聲譽正始中爲秘書郎遷尙書中書侍郎
高貴鄉公卽位賜爵關內侯甘露二年以討諸葛
誕功進爵陳侯屢讓不受詔聽會所執以成其美
景元三年冬大將軍司馬昭以蜀將姜維屢擾邊
郵欲大舉圖蜀乃以會爲鎮西將軍假節都督關
中諸軍事四年秋下詔使會統十餘萬衆與鄧艾
諸葛續並道伐蜀已而劉禪詣艾降遣使勅維等
合降於會十二月詔褒會功就拜司徒進封縣侯
增邑萬戶封子二人亭侯會內有異志因鄧艾承

制專事密白藁有反狀於是詔書檻車徵艾先是會與緒軍向劍閣會欲專軍勢密白續畏懦不進檻車徵還軍悉屬會所憚惟艾艾旣禽而會獨統大衆威鎮西土遂欲使姜維等將蜀軍出斜谷會自將大眾隨其後旣至長安令騎士從陸道步兵從水道順流浮渭入河以爲五日可到孟津與騎會洛陽天下一旦可定也乃矯太后遺詔使會起兵廢大將軍司馬昭謀旣定護軍胡烈給語親兵謂會有坑殺諸軍兵意諸軍兵聞之皆鼓譟出格

斬維爭赴殺會會時年四十將士死者數百人

梁荀朗字深明潁陰人少慷慨有大畧仕梁爲豫州刺史侯景叛嘗截破其後軍又破齊將蕭軌於石頭城入陳賜爵興寧縣侯官至都督合州刺史卒諡曰壯兄昂左衛軍弟咎太子右衛率子法尚累官巴東太守

唐王沛許昌人少勇決爲節度使上官浣所器妻以女署牙門將浣卒它壻田儼脅浣子襲領其軍謀殺監軍沛知其計密告之支黨悉禽德宗嘉美卽

拜行軍司馬李光顏討吳元濟奇沛風概署行營
兵馬使破賊有功加兼大夫從光顏定淄青以功
擢寧州刺史徙陳州李芥之亂以忠武節度副使
討芥加檢校右散騎常侍太和元年卒贈尙書右
僕射子逢從父征伐累功後亦至忠武節度使
張曄襄城人睿宗時爲銅鞮令性喜賓客太平公
主謀廢立曄謀誅之封鄧國公累遷左金吾大將
軍加特進卒贈儀同三司

五季梁王重師許州長社人爲人沉嘿多智善劍槊

秦宗權陷許州重師脫身歸梁從太祖平蔡攻兗
鄆爲拔山都指揮使重師苦戰齊魯閒威震鄰敵
擢潁州刺史太祖攻濮州已破濮人積草焚之梁
兵不得入是時重師方病金瘡臥帳中諸將強之
重師遽起悉以軍中氈毯沃以水蒙之火上率精
卒以短兵突之梁兵隨之皆入遂取濮州重師身
被八九瘡軍士負之而還太祖聞之驚曰奈何使
我得濮州而失重師乎使醫理之逾月乃愈王師
範降表重師青州畱後累遷右軍節度使司中書

門下平章事居數年著有威惠重師與劉捍故有
隙捍嘗搆之太祖太祖怒之重師遣其將張君練
西攻邠鳳而不先請君練兵小敗太祖以其擅發
兵挫失國威將召而罪之遣劉捍代重師重師不
知太祖怒已捍至重師不出迎見之青門禮又倨
捍因馳白太祖言重師有二志太祖益怒貶重師
溪州刺史再貶崖州司戶叅軍未行賜死

謝彥章許州人幼事葛從周從周憐其敏慧養以
爲子授之兵法從周以千錢置大盤中爲行車隊

伍之數示以出入進退之節彥章盡得之及壯事
梁太祖爲騎將是時賀瓌善用步卒而彥章與孟
審澄侯溫裕皆善將騎兵審澄溫裕所將不過三
千彥章多而益辦彥章事末帝累遷匡國軍節度
使貞明四年晉攻河北賀瓌爲北面招討使彥章
爲排軍使屯於行臺彥章爲將好禮儒士雖居軍
中常儒服或臨敵御衆肅然有將帥之威左右馳
驟疾若風雨晉人望其行陣齊整相謂曰謝彥章
必在此矣其名重敵中如此瓌心忌之彥章與瓌

行視郊外瓌指一地語彥章曰此地岡阜隆起其中坦然營柵之地也已而晉兵柵之瓌疑彥章陰以告晉益惡之彥章故與馬步都虞侯朱珪有隙瓌欲速戰彥章欲持重以待敵珪乃誣彥章以爲將反瓌旦享士使珪伏甲殺之審澄溫裕皆見害唐王宗壽許州民家子蜀王建以同姓錄之封嘉王永平四年荆南高季昌侵巫山宗壽敗之於瞿唐爲人好學工琴奕性恬退喜道術事建時爲鎮江軍節度使衍以爲太子太保奉朝請以煉丹養氣

自娛後爲武信軍節度使唐師伐蜀所在迎降魏
王繼岌以書招之宗壽不聽聞衍已銜璧大慟從
之東遷至洛陽得見衍泣下霑襟曰早從王言豈
有今日後乃亡入熊耳山天成二年出詣京師上
書求衍宗族十八喪葬之明宗嘉其忠以爲保義
軍節度行軍司馬封衍順正公許以諸侯禮葬

晉王建及許州人也少事李罕之從罕之奔晉爲匡
衛指揮使梁晉戰柏鄉建及馳擊梁兵敗解去累
拜遼州刺史晉攻楊釗建及躬自負葭葦堙塹先

登拔之從戰時晉兵已敗與梁爭土山建及以銀
槍軍繼進梁兵大敗晉遂軍德勝爲南北城於河
上梁將賀瓖以竹竿維戰艦於河晉兵不得渡南
城危甚莊宗積金帛於軍幕能破梁戰艦者至於
吐火禁咒莫不皆有建及重鎧執矛呼曰梁晉一
水閒耳何必巧爲吾今破之矣卽以大甕積薪自
上流縱火焚梁艦建及以二舟載甲士隨之斧其
竹竿梁兵皆走晉軍乃得渡救南城瓖圍解去建
及爲將喜以家財散士卒莊宗遣宦官韋令圖監

其軍言健及得士心懼有異志無令典牙兵卽以爲代州刺史建及怏怏而卒

李存賢許州人也本姓王名賢少爲軍卒善角觝太祖擊黃巢於陳州得之賜以姓名養爲子後爲義勇軍副兵馬使遷沁州刺史先是沁州當敵衝徙南百餘里據險立城而寓居至存賢爲刺史曰徙城避敵豈勇者所爲乃復城故州梁兵屢攻之存賢力自拒守卒不能近遷武州刺史山北團練使梁兵攻朱友謙友謙新叛梁歸晉而河中食少

人心多疑謀者因謂存賢曰河中人欲殺子以歸
梁宜亟去存賢曰死王事吾志也復何恨哉卒擊
走梁兵莊宗卽位拜右武衛上將軍莊宗亦好角
觝嘗與王都較而屢勝頗自矜因顧存賢曰爾能
勝我與爾一鎮存賢搏而勝之同光二年春幽州
符存審病甚莊宗置酒宮中嘆曰吾創業故人零
落殆盡其存者惟存審耳今又病篤北方之事誰
可代之因顧存賢曰無以易卿角觝之勝吾不食
言卽日以爲盧龍節度使是歲卒於幽州贈太傅

宋焦繼勲字成績長社人少有大志歷仕晉漢周以武功拜彰武軍節度使入宋爲右武衛上將軍出爲西京畱守初羣盜嘗白日入都市劫財聞繼勲至皆斂迹京城肅然遷莊宅使卒贈太尉子守節討夔州叛蠻以大義責其酋長皆自悔過內附官拜神武大將軍

吳虔裕許州許田人父徽左屯衛將軍虔裕少爲郡吏漢祖鎮許愛其精謹著以右職及移鎮太原以虔裕從開國擢爲引進使轉內客省使時鎮州

節度劉在明卒遣虔裕率兵巡護隱帝卽位召爲
宣徽北院使周祖討三叛以虔裕爲河中行營都
監率護聖諸軍五千以往李守真出兵五千餘設
梯橋分五路於連城西北以禦周祖周祖令虔裕
率大軍橫擊之蒲人敗走奪其梯橋殺傷大半師
還賜襲衣玉帶會樞密使楊邠上言求解職隱帝
遣人諭邠曰樞機之任非卿不可卿何聽間離而
爲此請耶使至而虔裕在坐卽颺言曰機要重地
非可以處俾後來者迭居之可也使還以白帝帝

怒出虔裕爲鄭州防禦使歷右衛左金吾衛二大將軍仍判左街仗事虔裕掌金吾三十餘年端拱初卒年八十八贈太尉虔裕性簡率言多輕肆右金吾上將軍王彥超告老虔裕語人曰我縱僵仆殿階下斷不學王彥超七十致仕人傳笑之每朝會及從遊宴太宗憐其壽高常慰撫之子延彬至儀鑾副使延彬子仁美至內殿崇班

王賓許州許田人小心謹愿年十餘事宣祖左右及長善騎射太宗領兗州節制太祖以署府中右

職太平興國初補東頭供奉官亳州監軍賓妻妒悍賓不能制時監軍不許絜家至任所妻擅至亳賓具白上太宗召其妻俾衛士摔之杖百以妻忠靖卒一夕死遷賓儀鸞副使領內酒坊從征太原又從征范陽與彰信節度使攻城東面五年車駕北巡副正仁贍爲大內都部署七年改洛苑使會汴漕壅滯軍食不給詔別置水陸發運兩司以賓有心計會領演州刺史與儒州刺史許昌裔同掌其事凡四年儲積增美號爲稱職俄改右神武將

軍黎陽當舟車交會禁兵常屯萬餘以度支使張
遜薦命賓護黎陽軍兼領黃御兩河發運使事俄
領本州團練使以賓請黎陽建通利軍命就知軍
事賓規起公署郵館供帳之器咸具加本軍大將
軍歲別給錢貳百萬俄兼河北水陸轉運使貝州
兵屯無壁壘賓選隙地築舍千二百餘以處之優
詔褒美召爲右羽林軍大將軍判左金吾兼六軍
諸衛儀仗司事淳化四年出知揚州兼淮南發運
徙爲通許鎮都監至道元年卒年七十三賻贈加

等賓事宣祖太祖太宗殆六十年最爲勤舊故恩
寵尤異前後賜賚數千萬俱奉釋氏在黎陽日按
見古寺基卽以俸錢修之掘地丈餘得數石佛及
石碣有賓姓名賓異其事以聞詔名寺爲淳化賜
新印經一藏錢三百萬以助之

明李隆鄆城人燕山左護衛將軍洪武間征戰有功
陞金吾左衛指揮僉事

劉鉉字元真襄城人歷職遊擊將軍其先世以文
章事業顯名當世卽其諸父名漢臣者同佐汪忠

烈城守功最著公幼學書成復學劍術好武侯新書饒有膂力然彬彬無武夫氣以故文人多樂近之時四鄰設團練獨以義勇訓練有法鄉黨服之流寇犯襄率義勇禦之殺賊甚衆一時四境賴以小安皆其撫綏之功王撫軍特疏題爲遊擊將軍屬以襄汎襄人倚爲安危者先後十餘年所其功在桑梓者大矣闖逆復來攻襄時汪忠烈以孤軍守城凡相左築垣塼備器械運芻糧餉士卒一切畫策皆將軍同其諸父漢臣輩身親督之備極艱

苦賊去復爲葺殘堞撫瘡痍招集難民整飭武備
人心恃以無恐漸復故業自將軍起團練至遊擊
累建奇功襄被賊兩破殺戮甚慘賴將軍之功多
所存活襄人憫其死私謚曰義愍將軍

黃啓明字穎臺世居許靈溝之陽勇而好義得里
黨心明季闖賊犯順土寇蠭起啓明與兄啓光築
折衝寨糾義勇保障一鄉自成破許置僞州守韓
林松林松以計誘啓光殺之啓明馳擒林松剖其
心祭啓光時中原大亂民生日蹙存者率結寨自

保其在許凡九營十八寨推五女店郭從寬爲首
啓明副之相依若左右手屢破賊賊相戒無敢犯
寨者

國朝定鼎散什伍家居課讀以壽終子琬康熙壬子
舉人任遂溪知縣以清慎聞次珮康熙己酉武舉
任守備勇敢類其父

郭從寬號洪宇許人素擅勇畧明季盜賊蠭起蹂
躪中州從寬約義勇保鄉里境內諸營寨推從寬
爲長咸聽命賊至與戰輒勝屢建奇功有司上聞

賜職副總兵

蘇舉宸弟和宸許州人忠義太常公之從姪並具
勇畧常以忠臣義士自期值明季寇起糾合族眾
保障一鄉崇禎辛巳闖賊攻許駐兵於楊家寨兄
弟率義勇數千出奇制勝幾挫賊鋒賊怒以全師
圍其宅欲逼之降乃登樓飛瓦擊賊罵不絕口賊
舉火焚之皆死

國朝李溥字方洲鄆城進士授三原令值姜襄亂率
士民死守探知賊夜半來攻預備擂石鉄毬燈令

守者潛伏頻打三鼓以悞之。比賊至已五鼓矣。用雲梯急攻。溥令懸燈照賊所在。大發擗木砲石。賊遁去。援師至。城保無虞。又流賊餘孽聚原。剽掠。請兵剪滅之。原人立祠以祀。歷仕至農部郎中。以母老告養歸。卒。崇祀鄉賢。

魏輔清。許州庠生。萬仞之孫。少習弓馬。屢試不售。充騎兵。嘉慶元年。楚匪竊發。從征。以智勇出眾。保舉行營外。委尋擊賊。李官橋。湖河鎮等處。連報捷。事定。回許。奉檄管外委事。至四年。帶兵至米溝擒。

獲賊犯數十名錄功以行營于總用

劉煥章字燦文武舉志氣果決嘉慶五年隨營平
翟集逆匪勇往直前奏捷錄提委守府

劉海甸字環疆武生性篤孝事父母始終弗懈且
英勇絕倫多智畧嘉慶五年郝寶教匪倡亂海甸
隨馬藩憲營進勦奮不顧身於鋒矢叢中奪獲馬
匹旗幟鳥戟刀鎗等物生擒殺死賊衆三十餘人
遂同官軍迅掃賊穴錄功題咨准就六品職歸部
銓選至十一年撫軍檄委任魯山把總海甸以父

母衰老辭撫軍乃親書效岳法閔獎之

忠烈

唐張善相襄城人大業末爲里長督鄉兵緝盜爲衆
附賴遂據許州奉李密密敗絜州以來詔卽授伊
州總管王世充攻之屢困賊遣使三輩請救朝廷
未暇會糧盡衆餓死善相謂僚屬曰吾爲唐臣當
效命君等無庸死斬吾首以下賊可也衆泣不肯
曰與公同死愈於獨生城陷被執罵賊見殺高祖
聞之嘆曰吾負善相善相不負吾乃封其子襄城

郡公

晉周崎召陵人也爲湘州從事王敦之難譙王承使崎求救於外與周該俱爲魏父偵人所執父責崎辭情臨以白刃崎曰周將使求援於外本無定指隨時制宜耳又謂崎曰汝爲我語城中稱大將軍已破劉隗戴若思甘卓任襄陽無復異議三江州郡萬里肅清外援理絕如是者我當活汝崎僞許之旣到城下大呼曰王敦軍敗於于湖甘安南已尅武昌卽日分遣大眾來赴此急努力堅守賊今

散矣又於是數而殺之

元趙連字伯器潁川人祖宏偉起家泰和尹著循聲
仁宗朝官浙東廉訪副使聞郡人許謙得宋儒道
學之傳延致爲師於是浙東人知向學卒諡貞憲
連登至治元年進士第歷官杭州路總管浙右病
徭役民充坊里正者皆破家連議以屬縣坊正爲
雇役里正用田賦以均之民至今稱便至正中河
南盜起湖廣荆襄皆陷兩淮騷動朝廷析河南地
立淮南江北行省於楊州以連參知政事分鎮真

州連方病卽輿病行會張士誠起海濱陷泰州興
化高郵知府李齊往招之士誠僞請降且乞從征
自効乃移連鎮泰州連趨士誠治戈船趨濠泗士
誠疑憚不肯發又覘知璉無備遂復反夜四鼓縱
火登城連力疾捫佩刃上馬與賊鬪市衢詰之曰
汝輩罪在不赦今旣宥爾誅戮且錫以名爵朝廷
何負汝乃復反邪賊以槊撞連墜地連瞑目大罵
死之

明宋鑑字孔昭爲人機警有膽氣初以國子生除興

平令丁艱服闋補任平江政令嚴肅尤畱心備禦
成化丁酉有流賊數百掠平江縣境鑑毅然曰不
去此則民不安方謀殄殲之策忽邏卒來報曰賊
至梓岡方食未爲備急捕之可得也鑑乃率家人
沈學等并民兵數十詣賊典史張澄等亦相率往
助擊賊殊死逆拒民兵潰却鑑前當之身被七創
猶手刃不已同赴者俱被害鑑亦因創仆卧賊退
乃輿舁至縣死部使者暨守臣上其事勅贈岳州
府通判錄其子一人爲國子生今平江民有專祀

焉

劉校字宗夏鄆城人性至孝母胡教子嚴偶不悅輒長跪請罪母悅乃起正德六年與詹軾劉概同舉進士授刑部主事迎父就養卒於途奔赴捧屍痛哭哭幾絕父屍面有塵以舌舐而拭之及起故官帝將南巡刑部諫疏校所草也杖將死大呼曰校無恨恨不見老母耳子元婁年十一哭於旁校曰爾讀書不多獨不識事君致身死乎善事祖母及母遂絕同時死者十一人校最先死世宗立校

贈尙寶卿賜祭錄一子入國學

蘇繼歐號抑堂貌魁梧文名知天下中萬歷癸卯鄉試二名成進士初任元氏縣歷官吏部郎中時逆璫魏忠賢竊權朝臣多附焰灼歐抗節不阿辭歸里居時有都憲楊漣上忠賢二十四罪坐貶於家尋拘於京先聞有禁與漣交接者死檻車過許歐憤爲之飯漣食嘆曰我生平知交今日僅見一蘇郎中耶其黨人嫉之矯傳褫革仍揚言械逮逼歐投繯而死魏黨敗崔案招銓郎乍嚇驚投梁上

之纒謂繼歐也後朝紳頌寃上憫其忠賜塋爲文
祭之畧云皎蒼緇以歸水鏡凜冰蘖而勵素風罹
奸諛之毒螫遭閹寺之兇鋒魄遊箕尾之上氣沛
江河之中加贈太常寺卿給廕與諡

邢國璽長葛人崇禎甲戌進士初任山東濰縣令
創築石城甚有勞蹟後晉東萊兵憲奉部咨監軍
入援道過龍岡突遇前鋒璽身先士卒被圍刃鏃
交加身被數十創墜馬而死子爲法爲憲俱守城
不屈死

國朝郭萬國本州庠生隨經畧洪承疇於軍前敘功授貴州銅仁縣令陞獨山州牧勦撫苗蠻有功陞江西吉安同知擢饒州知府康熙十四年五月耿逆叛將程鳳率衆攻城萬國禦之身被鎗傷一十六處家人二十一名隨時盡歿事聞恩賜祭塋贈光祿寺卿蔭子琛授晉州知州雍正十三年入忠義祠

劉澤久本州人負性豪俠膽畧過人順治十六年春有响賊六騎於州北帳地剽掠行客賊方去澤

適至聞被害狀單騎躡後緝至金龍口盡捕獲并
獲所掠金帛給還行客撫軍給匾獎賞充本州總
練康熙十五年楊撫修督南征令隨營授千總抵
琵琶灘殺賊甚多紀功授鄖陽守備康熙十七年
三月霍山之戰楊撫陷賊營澤奮勇救出旋聞修
督被擒復回力救而澤亦受害矣楊撫以陣亡之
子孫給劄免徭役雍正十三年據劄具題入忠義

祠

殉難

宋蘇過字叔黨東坡先生季子也翰墨文章能世其家士大夫以小坡目之靖康中得倅真定赴官次河北道遇綠林脇使相從叔黨曰若曹知世有蘇內翰乎吾卽其子肯隨爾輩求活草間耶通夕痛飲翌日視之卒矣惜乎人不知其此節也

明魏完真號亦鼎剛方清正一介不苟崇禎年間由明經爲亳州司訓亳士戴之以父憂歸會闖賊陷城冠帶當堂危坐謂家人曰朝廷衛封疆乃置臣子封疆失守臣子偷生生將焉往辱國且辱親矣

賊暴至脅完真從完真大罵賊怒殺之

盧開運食州學餼字文冲副使盧輔之曾孫也負
大志累科未第逆闖破許先一日泣語家人曰吾
家世宦累代清白使城破受辱何顏見先靈於地
下於是羅家人共哭拜祀堂畢誓約共死乃修酌
與家人飲極醉城破日舉家同溺井中

宋禧字宜興許庠學生資聰敏負氣節剛方正直
不詭隨於時辛巳年逆闖犯許禧分守東門晝夜
督戰身冒矢石畧無懼色及城破賊素知其名欲

授以官禧義不屈罵賊求刃而死

李文鵬字圖南許士負義氣重然諾崇禎十四年
逆闖寇許鵬分守南門矢石傷賊甚多身立垛口
中賊矢如蝟而死

李鼎鼎分守北門身中賊炮折去一股有隻手取
石擊賊不已人皆壯之死於城上

吳應箕字斗南許庠生素以智勇聞寇至仗劍登
陴爲死守計賊以雲梯上城西北隅箕奮臂大呼
手刃數十人力竭被執脅之降不屈罵賊而死

王之禎生員以守城死

牛瑞宋務崇宋獻猷王澤注俱生員城破殉難

宋自盛於明季捐金助餉又輸粟賑濟饑民流賊

破城殉難死

袁準世敦孝義修路建橋不遺餘力里閭高之城

破忠義不屈投井而死

趙化鳳北城千總胆氣過人賊至衝犯賊營砍傷

數賊賊頗憚之城破不屈死

陳濟東城千總以炮矢傷賊甚多及城破賊欲委

用義不屈死

申則古

申

紳

焦文輝

俱城破與賊巷戰死

馬玉聲同子生員化蛟化驥皆抗賊身死

胡廷臣

宋之望

王澤侵

俱不屈死

袁楫本州人闖攻許楫禦敵奮不顧身矢盡力竭

自刎死

李光閭襄庠生寇至城潰懷文山集公服投泮池

死妻女俱殉難

以下俱襄城

張本濬被執不屈賊怒寸磔之妻黃氏撫遺孤守

節五十餘年同時與難者貢生耿華國等百九十人并見明史祀忠義祠

李更新字潔軒襄城庠生工詩著樂府百二十五首佚與人無城府一涉道義不爲勢利動崇禎時流賊犯襄境里人倉皇避獨著衣冠罵賊而死賊欲驅其妻朱氏去氏大罵曰我李潔軒相公妻也鼠輩敢辱我亦被害

姚成性蔭生授雲南知府守襄東城城破不屈罵賊死長子兆牙以蔭仕戶部郎中聞父殉難嘔血

死次子兆鶴庠生聞父殉難卽持刀入賊營尋父屍賊執而欲刃之答曰吾父殉國吾應殉吾父豈畏死哉賊嘉其孝得父屍歸葬

侯新建守城殉難闔家婦女投繯死

張俊有勇力老獍獠賊犯襄時俊率鄉兵余二等數十人禦之殺賊甚多力竭俱被害

生員李騰霄劉漢臣張懷瑜張琇等九十餘人城破俱被賊割去耳鼻一時殺死斷手足死溺死者無筭

邢晤臨潁人善舞雙刀崇禎七年寇劫小商橋一帶晤率鄉勇擊之賊遁去十七年寇復至晤與賊戰力竭死之

陳則寔臨潁人流寇掠邑境祖母老不能行父于陞以爲憂寔乃負祖母避之俄而父遇賊寔奮不顧身與賊戰死之

沈尚賢鄆城人號養吾以國學生授蘄州佐罷官里居崇禎丁丑歲寇勢猖獗於七月十九日掠商橋鎮蓋其祖居也賢獨挺立不避家人鄰里咸勸

之行賢毅然曰走欲何之吾雖叨升斗祿亦命官也禍患何避乎寇至乃整衣冠出門厲聲怒罵賊鑿其齒斷其舌而死

李珍字席之郾邑廩生崇禎壬午賊至被獲有識之者曰此席之先生也釋之癸未十一月賊黨復至屠殺三千餘人珍復被獲其邏卒執曳見其帥使之拜不屈遂斫其膝復罵不絕賊以刀截其舌支解焉其妻王氏年未三十守節家貧數日不舉火珍弟子間有周之者鄉稱王氏不愧其夫焉

張經畫字金門十歲遊庠崇禎十四年十二月寇
窺鄆城以河溢難渡而去畫居城南被執聞其學
行不忍害之畫罵賊而死

陳際昌鄆邑庠生素行端方崇禎十二年遇賊不
屈罵不絕口而死

宋賜畫鄆城人明末流寇入鄉村畫挺身不避賊
攻其樓罵賊斷舌而死

王士表鄆城人流賊犯境表率鄉族各執利刃竟
接賊鋒遇害長子輯瑞攜穉弟之瑞逃已離五里

許聞父被害仰天大號曰我父死矣我生何爲奔
至父所俱死於難輯瑞妻趙氏抱幼子見翁夫俱
亡亦投火而死

李春華字秀實長葛人屢中副榜以明經授懷慶
廣文後陞州學正明倫造士有化澤焉致仕歸崇
禎辛巳城陷被執賊威以白刃毅然不屈時年七
十有五與長子衛經歷又彥次子太學生又毅俱
被害

李養正字柱礎長葛人以理學文章名世由恩拔

授靜海簿轉鴻臚典簿爲仇忌歸甘貧樂道課子
讀書談論經史竟夕不倦流寇薄城捍禦西城四
十晝夜城陷與子庠生正芳正莪同被害

孟良屏字旭六性恬淡好法書領丁鄉鄉薦其父
六旬始生屏先有螟蛉兄屏體前人意待之加厚
財產均分焉睦懿親周鄉黨人尤敬慕之葛遭寇
亂屏激厲衆士分城而守屢摧寇鋒辛巳城陷被
獲不屈而死

黃朝聘字起莘青城令家才長子也好學功苦舉

明經性至孝母病身侍湯藥非親嘗不敢進及喪
哀毀幾於滅性歲祔出資養士鄰里賴以全活者
數百人乙亥之變分守西城出奇屢破賊鋒辛巳
城破與守城人一時被執慷慨罵賊死其時與寇
巷戰衝鋒罵賊而死者五十餘人亦足見葛之士
氣爲名教干城也其有姓氏可紀者如張範孔曹
一俊張振翊武崇文李應賓侯璽朱之鼎朱之嶼
李又琦李又培李正芳李正哉李紫芝呂家修邢
爲範邢爲法邢爲憲孫之昌孫麟定時運昌張善

法劉志允馮士髦張忠盡張謙吉惜不盡傳也

楊承傳長邑庠生性義烈值城破遇賊奮擊殺之
後賊衆至被害

朱萬壽陳奇蘊俱長葛生員崇禎八年因流寇馳
過不屈而死

許州殉難鄉紳魏完直等九人生員李文鵬等四
百十五人武生王應鵬等十六人省祭官王有威
義民馬玉書等五百餘人節婦王氏等二十八人
長葛殉難鄉紳舉人孟良屏等十一人生員張範

孔等五十九人烈婦戴文妻王氏等十五人

嘉慶元年從征楚匪陣亡兵目

謝明義

樊振禮

趙士桂

吳永振

呂亮

宋獻鳳

褚漢德

鮑永成

董鳳魁

韓兆禮

葉鳳鳴

王萬青

張玉貴

張瑄

呂廷臣

韓松山

屈良貴

義行

漢劉翊字子相潁川潁陰人也家世豐產常能週施

而不有其惠曾行於汝南界中有陳國張季禮遠
赴師喪遇寒水車毀頓滯道路翊見而謂曰君慎
終赴義行宜速達卽下車與之不告姓名自策馬
而去季禮意其子相也後故到潁陰還所假乘翊
閉門辭行不與相見黃巾賊起郡縣饑荒翊救急
乏絕資其衣食數百人鄉族貧者死亡則爲其殯
塋嫠獨則助營妻娶獻帝遷都西京翊舉上計掾
是時寇賊興起道路隔絕使驛稀有達者翊夜行
晝伏乃到長安詔書嘉其忠勤特拜議卽遷陳畱

太守翊散所攜珍玩惟餘車馬自載東歸出關數
百里見士大夫病亡道次以馬易棺脫衣歛之又
逢知故困餒於路不忍委去因殺所駕牛以救其
乏衆人爭之翊曰視死不救非志士也其高躅類
如是

荀昱字伯條潁陰人淑兄子也爲沛相正身疾惡
志除閹宦其支黨賓客有在郡者纖罪必誅時太
學諸生名重天下莫不高之爲之品曰昱與李膺
等俱爲八俊會聞喜侯寶武太尉陳蕃誅宦官謀

徵引天下名士李膺劉猛杜密朱寓而以昱爲從事中郎共定計策太后猶豫不決計不得時定節等知之先爲亂殺竇武陳蕃捕昱及膺密等百餘人皆死獄中昱弟曇爲廣陵太守與兄同志每相勉曰苟罪人斯得雖死何傷昱死曇亦禁錮終身荀巨伯潁川人遠看友人疾值敵人攻郡友人語巨伯曰吾今死矣子可去巨伯曰遠來相視子令吾去敗義以求生豈荀伯所行耶賊旣至謂巨伯曰大軍至一郡盡空汝何男子而敢獨止巨伯曰

友人有疾不忽委之寧以身代友人命賊相謂曰
我輩無義之人而入有義之國遂班軍而還一郡
並獲全

唐孔璋許昌人元宗時李邕爲陳州刺史會仇人告
邕贓貸枉法下獄當死璋上書天子言邕剛毅忠
烈臨難不苟免往者折二張之角挫韋氏之鋒而
邕有功於國今聞聖賊下吏死在旦夕臣聞生無
益於國者不若殺身以明賢臣願以六尺之軀膏
鐵鉞以代邕死臣與邕生平不款曲臣知有邕邕

不知有臣臣不逮邕明矣夫知賢而舉仁也任人之忠義也獲二善以死臣又何求伏惟陛下寬邕之死使率德改行興林父曲逆之功臣得瞑目附禽息北郭之迹大願畢矣疏奏邕得減死

楊元嗣許州人上書攻張昌宗見殺

明吳敏本州人慷慨尚義正統成化閒疊輸粟千數百石賑饑復助軍需銀二百五十兩奉詔旌表賜七品散官子曰茂曰芳能繼父志成化己丑出麥千餘石賑濟詔封義官而芳獨捐千金創建石固

橋邵文莊公爲之記又有吳俊吳梗皆出粟賑饑
隆慶中賜世義坊

管繼壽許人萬歷中歲饑壽施粥五月活人甚多
生平施棺百餘人取不問其姓名修賴橋施糧百
餘石大水漂流死尸百餘以棺木瘞之勸人爲善
好言因果事壽近百歲卒

馬玉聲修廟建橋樂施好義年逾七旬有丈夫子
六義方以教咸補弟子員明季闖賊圍城至祁寒
守禦無衣食玉聲捐資數百金助之

黃天祐許人慷慨好施明季歲饑兵亂祐分儲設粥塲活人頗多又約衆築寨保障一方

杜寧臨潁人爲菁城丞致仕歸居鄉好施舍爲陰德事卒年八十三

王士榮呂信邵寬滕宣俱臨潁人正統時施米賑饑賜勅嘉獎

王虔臨潁民積粟萬斛成化間賑饑

邢大定楊丹俱施銀修臨潁學並置學田

陶鯨袁尚志王嘉祥滕復性韓學敏滕知性曹含

王宗舜俱臨潁人萬歷時捐銀修磚城者

楊禮臨潁人性豪俠尚義勇有劉九兄弟剽掠一方禮擒治之死後土人爲之立祠於城隍廟西廊俗呼楊五廟

黃鍾王讓齊整俱襄人正統時各輸粟千餘石賑荒

黃載閆朗丁永齡馮曉方玪苗聚孫珍耿造張蘭劉靜胡善周錦劉景倉萬民表李濮李貫楊思恭方真俱襄人嘉靖時出穀銀賑濟造獲賜七品散

官

傅霑襄城人事孀母克盡孝道代其姻親李世祿
償官銀一百五十兩又捐銀百兩修儒學歲荒累
施穀麥銀兩賑濟更出貲埋屍骸之暴露者

姚欽宸侯新岐李悅心辛成才張永禧王棋皆襄
人萬歷四十年水荒共輸襍糧一千六百餘石麥
種九百五十九石

丁坤襄人嘗捐銀千餘兩周濟省城各縣飢民撫
按嘉其好義

郭堂成化元年輸粟四千石濟饑旌表賜職文林郎

劉彬襄人成化宏治年間荒旱捐穀濟貧正德年間流賊至聞彬名皆曰劉善人家不可入一村女子皆躲於彬家後園得免害

徐恭襄城人捐銀五百兩重修南門外惠政橋其弟正亦捐銀剏修東閣時皆乏嗣工甫畢各生一子

呂三詔鄆城人事母孝撫姪如子明季土賊刼歸

村圍砦五六日詔捐糧百餘石以濟絕食者後流
寇攻砦幾陷詔出錢三百千募壯士守之全活甚
衆

張英長葛人正統間捐粟一千五百石賑濟已旌
李養才好善樂施葛邑人待以舉火者甚衆因歲
饑賑粥享年八十有八

楊慎成長邑庠生任俠好義明季流寇紛擾獨力
捐金築石固砦保全一方里人感其德建祠立碑
巡道沈爲文以記之

陳鉞長葛人輕財好施邑東置地二頃給貧民耕種並不索賦鄉有貧不能舉喪者助財捐地葬焉年九十步履若飛

車瑄連陽亨之子也遇歲旱荒捐粟一百二十石賑饑母死哀痛不已相繼而亡鄉人咸誦其孝義陳鎰邢國輔俱長葛人拾遺金不昧鄉人義之

呂璞長葛人輕財好施遇荒減穀價以濟貧民施惠於人無德色南門外砌磚橋一座以利往來又施地掘井立碑記之

孫章侍孀母以孝聞建潁水石橋一座給粟施棺
周貧卹寡人皆稱孝義

崔山于長葛南門外倡建石橋一座人不病涉今
河道雖塞而石橋猶存

張廷珍張大會洪克恭俱長葛人嘉靖間各捐金
助遷學宮王宣張引各捐住基以廣學舍

尹長壽長葛人歲大饑捐粟一千五百石賑濟全
活無算當事聞之於朝立義民坊以旌之恩賜二
子入監讀書長子寬有父風捐粟一千五百石亦

建義民坊於西關

張綽捐貲建石橋三座在董村店

張大約長葛人洹寒構立木橋以利往來每歲率以爲常

呂養化長葛人輸粟百餘石以賑貧生

黃鍾號草溪長葛人以孝友聞施義井義塚捐修學宮周孤寡助婚葬

孟存字默齋長葛廩監生性謙謹和厚未嘗言人過失施恩不望報有鬻妻者資給完聚子良屏登

丁卯賢書人以爲積德所致

李毓桂長葛人郡庠生素行敦厚族黨貧乏者悉
賴其周濟歲凶桂作粥賑饑又施綿衣數百件全
活者多時大疫延醫施藥又建老龍等橋其爲善
不倦如此

余賢爲本州史氏壻史乏嗣欲以田產遺賢賢不
屑也史卒賢出已貲殯之盡以所遺者給史氏遠
族

國朝

高加宦州人明季寇警捐貲築寨保守一鄉弟姪被掠遺姪孫孤幼撫育成立襄士關興漢避難於許貧不能葬母宦助其喪順治初年舉鄉飲賓

寇來禎廩生事母至孝明季闖賊圍許來禎約同志誓守城陷猶手刃數賊賊去城內外暴骸山積禎收瘞爲塚立碑每遇殉難日祀之又捐貲數百金修葺文廟學道給匾獎之

寇哲字愚夫順治戊子拔貢父歿流寇擾許時哲甫弱冠與二兄奉母走鋒鏑間流離困苦未嘗少

失母意及鼎革後承歡之暇奮志誦讀文學爲一
郡冠友愛尤篤田園多在三圈橋東選拔後盡以
奉二兄遷白廟村營業以居焉有孀嫂孤姪不能
存活隨養贍之又建義塾延胞兄來禎爲師凡族
中及親隣之秀者招之來學給以膏火筆札因列
膠庠者甚衆迄今里人稱頌不衰子原煦貢監克
世其業

周文炳貧而好義順治十二年黃陂吳雪旃入都
爲縣令雪旃族叔送旃母王氏之任甫至而旃卒

縉紳重賻之以爲歸橐若叔扶嫗渡河利其橐推
嫗水中下石焉踰日而嫗竟不死若叔已獨歸楚
嫗甦而乞於路行至許境文炳見而憐之鬻田辦
資並遣其子送之抵黃陂若叔尚未之知也給其
家曰母死而塋矣及見嫗歸而驚匿嫗白之當事
亟捕若叔置之死其子旋許紳衿各賦詩以贈
安三極施粥賑饑嘗代人舉火順治初舉鄉飲
韓茂林本州附例監生任兵部司務年老假歸好
善樂施乾隆四年大水茂林捐麥二百石賑饑七

年捐米百石施粥賑流民修刻志書倡捐銀二百兩爲刊費他如助禹州登封修砌道路美舉各載本乘茲不復贅

范繩仁本州貢生乾隆四年水荒捐銀五百兩助賑七年復捐施粥米四十石鄉人咸稱之

尚上本州太學生多義行父歿所施之債悉焚其券承先志也雍正七年七月大雨溪水暴漲鄉閭漂沒被水者數百人寢室無所上招集於家搆茅棚數十間以爲栖止賑粥二十餘日全活甚多本

州祖牧給匾表其閭董牧爲文紀其事凡修理橋
梁道路冬月施舍綿衣歲以爲常有流民鬻妻賣
子者更出錢代贖全人骨肉四十一歲卒題旌
入祠

宋氏石梁人雲南路南州知州寇塏之母秉性柔
嘉樂施濟物氏所居附近有石梁河舊堤乾隆四
年爲大雨所塌氏念村民無力興修獨捐貲百金
修堤防禦以保田禾乾隆六年三月內又命子塏
親歷河堤逐一省視夯硪堅實增高培厚又約費

三十餘金一方農民獲免水患無不感頌寇母賢德

劉從義石梁人好施濟乾隆四年邑中被水有洪濟興國兩寺頗高廣近從義村貧民競就居之次年四月官賑旣停麥尚未登老弱待哺者百餘從義日舁粟至寺中供養殮旣罄出二百金告糴以給隣家貸粟者悉應之亦不下二百戶比秋逋者加息以償從義曰曩歲歉甚今卽有秋亦無餘積若償我又將稱貸以爲食我忍爲此舉券悉焚之

王澤深張奇策皆臨潁庠生郭毓英婁習易皆臨
邑民明季流寇掠境澤深等築寨自守寇至戰於
白橋亦可謂義勇者

李在公字梁門襄城人髫齡失怙奉母以孝聞性
嗜書樂施濟凡遇里中疲癯殘疾者輒給湯藥調
養之王寅癸卯大河決兩岸漂沒田舍流民遍野
爲煮粥道旁其所全活甚衆

劉世瑾襄城農民康熙六十一年民多流亡過襄
瑾於北關拾銀七十兩不去俟失銀之人至與之

無吝色

齊文英字俊顙襄城人以明經仕山東寧海州州同攝福山縣篆時值軍興督餉甚迫福民逋賦三千餘金古安二令被劾羈畱公惻然馳書促家人賣田宅輦金代償民困頓甦二令亦得脫然去王訪襄城庠生孝而尚義凡姻親吉凶不給者出貲以助之歲荒出穀豆賑濟族眾舊有十季之累捐地四十畝以供役費人皆義之

王家顯襄城人樂善尚義南關大橋遭水圯捐二

百金修整乾隆元年出已財五十金墊買高橋保
應完漕糧貧戶不能償悉置不問乾隆四年水災
官發麥種銀兩顯首先倡捐銀二十兩士民因之
鼓舞乾隆六年當事者爲貧民賑粥顯請捐貲接
賑前邑方令屢給匾以表其門

盛愈襄城貢生事親能體親心友愛於兄讓產與
之且睦族恤貧修橋補路造渡船施義塚捐麥穀
百石樂善好施雅大中丞表其門曰必有餘慶

宋度襄城人好善樂施添建義學供塾師三年飲

饌助婚嫁喪葬創修高橋造義渡施義塚地造避
水之高閣濟被水之貧民雅大中丞匾其門曰德
洽幽明

閻作標字表臣襄城附監事母孝謹胞兄早亡事
孀嫂盡禮康熙十九年施粥賑饑全活流亡甚衆
所居西有古運糧河秋冬人病涉疏其淤塞捐貲
爲梁往來便之其助人婚喪之舉孜孜不倦舉鄉
飲僎賓

常定遠襄城監生爲人忠厚端方稱愿謹士捐貲

合藥施濟貧病刊五經圖全本施惠後學本州柴
太守匾其門曰樂善不倦同時庠生耿迪吉命其
子士標修學宮石坊石路南郭大石橋

余澤濟襄城老民素行好善濟困扶危施棺木以
助喪立義塚以掩骨收養旅病之人醫痊而給路
費調治傭工之人濯污而賜湯藥施衣窮人以遮
體分金猶子以成家且以麥糧數十餘石爲親族
鄉黨歲事不給之助享壽九十有五

牛發財襄城貧民道中拾銀一兩二錢仍給還失

銀之人毫無德色亦貧而好義者

劉文傑襄庠生雍正九年荒隣里無以舉火傑按戶計口出粟百餘石賑之上憲給匾表其門

靳廷裕靳廷祿鄆城人兄弟白首同居敦睦好義獨力建修沙埠口橋約費四五百金又輸米二百石捐修乾勒橋鄉人咸義之

張宏業陝西人商籍於鄆四世同居歲荒施金施粟全活甚多邑令以調卹可風表其門

梁心浩鄆城人好施舍康熙三十年有張其剛者

攜妻子就食於鄆夜宿康家廟廟火衆責剛修剛
窘甚將鬻其妻子浩捐樹二十株銀三十兩代剛
修保全其家子仲賢嘗館於高橋鎮拾銀十兩遍
招失者不獲遂以其銀修鄧家店路仍捐麥以助
工食焉

楊蘭鄆邑人有客張璧寰者遺銀十兩於泰山廟
側蘭拾之以待失者次日客泣尋至蘭問其由出
原銀還之

劉尚智業賈出入公平遇人急難捐助施濟不可

勝記在鄆鄧襄寺收埋白骨九塚載之寺碑壽八十七歲

卞時琨字琢庵鄆邑監生喜談詩文爲人淳樸端謹慷慨急公乾隆五年大荒捐銀二百兩賑饑雅大中丞給匾曰功回鄒律

李啓光施義田以贍養宗族改修濟衆橋不惜資費詳葛令王茂才碑記

左輔英葛邑文學道拾遺褚二發之皆白金英意兵荒之餘安得此必其人急辦公事適遺於此隨

詣縣遍詢有傳石相保公直李光宇張聚吾失銀
哭往西去英復前覓廉其數多寡悉合慨還之

王祚增字益吾長葛人任德化主簿好施濟設義
學延名師里黨子弟賴成就者衆明末大饑施粟
麥以贍貧乏邑人賴之

張仔觀字光生太學生有才行尤尚義樂施葛令
米漢雯遷建學宮苦無善地觀捐地一區價值百
金換生員張勲居宅今尊經閣前至泮池蓋其地
也且經營計畫備極勤勞勲宅價浮於觀衆方議

補勸亦不受捐助修建一時共爲倡義之勸

趙邦彥葛西里民性慈好施明季屢值凶歲施財施粟全活者千餘人又躬爲粥以濟他鄉流離并給其衣糧每於讀書者更加厚焉

張惟忠字孝全長葛人敦行孝友且性耿介尚義完婚助塋之類甚多負不能償者悉焚其券

冀養浩字景孟長葛歲貢好義樂施其周給貧乏扶持孤幼多不勝書明季遭亂避難河北宗族百餘人俱爲土賊唐六等屠滅及亂後歸家奮身鳴

之法司捕渠魁悉正典型不惟爲宗黨雪恨凡遭
毒之家無不感激歷南陽葉縣寶豐光山儒學教
諭所至文教振興當事奇其才署桐栢縣事教澤
惠政播頌遠邇卒於官

朱良臣葛邑義民雅大中丞給匾額曰濟困扶危
任振已貢生忠信篤實康熙三十二年歲荒放賑
三日出粟四百石

寇壤增生因石梁河夏月水漲行人病涉慨捐數
百金建橋名曰礄址康熙四十八年歲歉市無糧

壤出粟減價以糶州牧郎表其門曰一鄉善士

寇石存庠生輕財尚義康熙四十九年歲凶穀價
翔貴市無糶者乃出糧分移各鎮減價以售貧不
能具價者亦概與之

劉岫字雙峯許州監生多義行乾隆四年大水散
粟一百六十石濟飢六年許府改州童試千餘人
而入學仍石梁縣額岫倡首赴部陳請準州學二
十名子席珍庠生廷珍歲貢授國子監學正孫海
觀舉人姪源生舉人任上蔡縣教諭一門人文蔚

起皆岫培養之力

張良策監生乾隆四年大水施麥種一百石捐修聚星書院思敬齋三間

蕭尹素好施予乾隆四年大水石梁令吳勸紳耆輸金助賑尹首捐銀百兩眾欣隨之

楊春育子光振事親能以志養母于氏孀老善治生而樂施嘗積糧數百石乾隆五年歲饑振承母命出粟以蘇窮苦賴以全活者甚眾石梁縣尹梁額其門曰利濟慈懷

張應科吳村保人乾隆七年本保遭水災各戶共欠倉穀百餘石不能完納九年春科盡數代交州牧甄給匾曰視衆猶已

劉子亮興源保人泉店西偏有水南流入潁舊建石橋五座乾隆七八年間漸就傾圯亮獨力重修州牧甄給匾曰利濟永懷

王承緒監生倡修利濟橋乾隆丁丑歲饑越境買糧歸賣每斗減價百餘種油菜數十畝令貧者刈取賴以全活者甚衆

郝珩監生乾隆二十一年大水珩捐財輸粟救濟鄉鄰無數五十一年大饑弟璽亦如之

呂振國乾隆甲申監修州城捐貲不吝

徐名瑾乾隆三十一年大水設粥廠食近村之餓者遠村不能就食施穀數十石濟之

鄭本榮年五旬無子乾隆四十九年歲饑買流民楊姓女將納爲妾議既定女哭不已榮惻然曰任使終身無後不忍其父女相離價銀三十二兩如數與之令楊攜女去越一載榮妻劉氏生子名蘭

鄰里以爲積德所致云

韓良士字碩輔貢生乾隆甲辰歲饑張乙孀母幼子併日而食無以爲計良士收而養之楊五飢瀕死良士扶持調攝閱月始健俾食其家五載開館授徒循循善誘束脩有無弗問貧者更助之膏膳盧夢卜庠生性仁厚以醫濟世病痊不受謝年八十餘有延請者輒扶杖往此真以好生爲心者韋肅賓乾隆甲辰歲饑拾銀八兩於路藏之以待覓者後黃臣元尋問件數確符慨然授之無德色

司玉華乾隆五十年歲荒以粟米貸貧者全活甚衆延師課授里中寒畯獨任束脩嘉慶十三年旌獎五世同堂

汪庚監生乾隆五十年歲荒出粟分給里中貧者次年春粟盡賣地數十畝易粟以濟

時而健乾隆乙巳歲饑族嫂張氏家無隔宿舂夫亡一子未晬盤健撫養之使成立生男有哲及長倭蕩不戢乃給良田五十二畝宅一區使異居

張道傳監生與堂兄道新等式好無尤以口繁析

居道傳讓於良田六十畝房屋三十間

高景昇監生乾隆乙巳歲饑有焦氏婦鬻女於市
臨別母女相抱哭昇惻然贖之令母女隨至其家
寄養焉女及笄昇爲之擇所宜配

杜挺生乾隆五十一年歲饑族人步雲貧無依生
給之粟並與宅一區嘉慶癸酉又饑族人成林將
鬻其妻生代爲謀生理夫婦得完聚

張殿魁字映五州判乾隆丙午歲饑斗米千錢餓
莩載道魁惻然心傷出粟分給窮民一月之間其

門如市並於桂村集減價糶糧獨支三旬四方多
賴全活

劉萬同拾銀四百五十兩有客人李姓訪到萬同
如數還之鄉黨稱爲拾金不昧

王王安乾隆五十四年赴潁橋道拾白銀五十兩
訪知爲同里王姓物卽送還之

張茂性廉介居臨官道三拾遺金約百餘兩皆還
其人前州牧甄給匾學博黃天衢爲作傳勒諸石
趙鳳瑞素與同鄉某善某爲雲南州守要同赴任

適有庠生忤某意某怒將繩以法幕友復激之瑞力爲請然後已後生登高科權長葛篆赴許謁瑞於家餽金三百兩瑞卻不受

完維藩堂弟維翰之僕殺人遠竄坐罪維翰維藩憐弟母老子幼代任罪州牧廉得其情欲釋之而維藩固承遂充浙江軍生子鼎登賢書人以爲德報云

王廷珍字殿璧大父桂以儒醫名世廷珍繼之且歲製良藥爲膏濟人臨終以囑長孫瑞麟麟遵行

不怠其次孫生員九臯曾孫映離仍奉遺方施濟
歲費不止萬餘錢

徐世英獨捐已貲於村東漯河建石橋曰大橋斜
溝建石橋曰高橋

趙臣襄城人好義恤貧拾金不昧施棺以殯埋其
鄰人受惠甚多

張旺有地六畝餘當通衢行人苦其迂曲慨然開
爲道路

劉棟陰陽學爲人溫厚和平樂善不倦施茶施藥

數十年獲濟者甚衆子勲臣入監孫上林副貢曾
孫尊賢遊泮易曰積善之家必有余慶信夫

宋樹本里人之母死貧不能具槨樹本爲買而葬
之

岳殿魁郡庠生好善樂施歲饑出粟數十石周濟
貧乏鄉黨賴以全活者甚衆又精岐黃術救人無
筭概不受謝

劉從順素好善補葺衡石橋二十餘年不言勞復
於橋南買地一區種柳息行人

呂天位貧而好義嘗自肩土修補許田南橋墊陳曹東路村臨大道每暑月躬自拾柴煮茶以待渴者

孫廷喜增生因口繁析產讓已應分地四十畝於兄其姪有遊惰者鬻其地後悔過改行以原地還之不受值

徐世美獨捐已貲於村東小河修石橋一斜溝修磚橋一

鄭鵬搏貢生嘉慶九年裕州溫姓因年荒鬻女於

搏越七載女成人乃招其父母與之銀四十兩衣物十數件雇車送女隨父母歸其家道光十六年本州公修節孝祠建總坊捐錢一百千助工其他周恤貧困亦多足稱者

王典許之貧民由勤儉積錢五十餘千見村後橋圯人多病涉盡傾所積修之

康永坤家僅中人產慕義好施於村西建三官廟置義塾輸地二十畝爲脯脩資族有孀媼老而孤貧坤給以衣食始終無德色旣卒買棺塋之鄉部

苦甲長役坤捐腴田十畝助本保充斯役者辦公人感其德爲勒石以誌

韋宗傑耆民冬祁寒有行客九人困憊傑助之貲使去又於夏月施茶躬親挹注歷十數年

楊國英年十五失怙事孀母甚謹從孫幼孤無依英收養成人爲之治產娶妻又與族姪宅趾相連界不正各讓一尺里人稱爲仁義衚衕

沈邦傑年十六自鄉塾歸拾遺金四十餘兩揭字徧城鎮迄無尋者遂送學署助修文昌閣

陳廷棟附貢職州同石固鎮人嘉慶初因楚匪跳
梁爲一鄉保聚計倡築南砦約監生王蘊臣典吏
曹衍照監生蕭吉士等各出貲助工而廷棟獨任
艱鉅費金尤多

盧漢文附貢生義兄繼文蕩其業無以庇子姓漢
文收養於家割田百三十畝給之

孫寅州同嘉慶十二年於本村設立義學延師主
講貧不能讀者助之膏火

閆含三州同嘉慶十四年修補西關大路捐錢百

三十千十八年出粟五十餘石濟飢

梁璞監生甥裴昌運少孤璞撫養之爲完婚資以膏膳使得專志讀書執贄者碩之門遂入郡庠族孫萬喜乏生理璞予之衣食三十年以爲常里人張國瑞久客於外璞賙恤其老母幼子如外庾盧永壽欠錢七十千有奇永壽卒其妻謀取繼族人憚其債負無肯嗣者璞聞之命子祿閣持券至伊家同人焚之其嗣乃定

王相貢生嘉慶癸酉歲饑六歲孤童董杏林匍匐

市衢餓垂斃相養之於家長又爲授室今杏林家
稱小康云

蕭吉士字藹如監生歲饑買童子四人教養數年
各給貲財使歸其親同鄉范炳章趙順先後以歲
饑鬻其女士出已貲胥代爲贖全乃前婚石固築
南砦士獨任東面土工與東西門樓雖破產弗之
恤

楊敬誠嘉慶十八年大饑以已地三十六畝與堂
叔朝綱等使便賣度荒

劉道顯貢生嘉慶癸酉歲饑村有曹姓賣女於人
顯遇之出貲代贖道光六年輸錢二十千地三畝
資義塾膏膳

張月三拔貢嘉慶甲戌春出糴郾城適於逆旅聞
婦人哭甚哀詢之乃隣村管姓女因歲饑其夫賣
於確山楊姓楊以娶繼室爲名實將轉鬻他所氏
誓死不從故哀遂憐而贖之爲擇良家嫁焉

王封堤州同嘉慶癸酉歲饑其從堂兄天成居別
村食指數十室懸磬如也封堤周以百金家口卒

人物

賴以全天成卒復出貲塋之嘗輸錢助修社學試
院子命三吏三皆早年入庠好義樂施有父風

常以辛字西峯副貢生好讀書行古之道里人張
乙以歲饑將賣其妻議已定婦泣欲死周乙亦將
鬻其妾以辛量給張以穀周以錢遂各寢其事無
生離憾

楊文會監生嘉慶癸酉歲荒同里韓釜待炊者多
會按日酌給升斗從無後時道光六年州牧立社
學會命其子復性輸地五十二畝議叙加八品銜

郭乾行監生嘉慶癸酉歲饑出粟百餘石助賑未
幾疫作復合良藥施人者數月二十五年地震東
郊學舍圯州牧張捐俸繕治乾行輸百金以助
吳國幹嘉慶癸酉施地四畝爲義塚

張殿擢武生好施予里人張舉父死不能塋擢厚
賻之又杜文德貧而鰥劉東有賀元并幼孤無室
擢皆助之婚娶

王輔德監生族嫂袁邁貧窶輔德贍給之終其身
族子文燦無儋石儲與之宅一區地十餘畝

人物

劉丕承嘗買太康縣馬德女令其妻善視之及德來省女丕承予以路資使攜女歸

貢紹先衛千總嘉慶癸酉歲饑道殣相望捐金掩
毗馬烈女墓碑幾傾爲立而雷之於迎水堂建屋
九間爲寒畯肄業所

宋邦太族姪啓旺避荒歸家徒四壁邦太慨將旺
祖賣於已地二段還之不取值

毛顯彝監生其祖兄弟三人葬於析居時念三房
食指繁多讓與宅一區田百畝

楊國彥庠生五世同堂族人文斗夫婦衰邁無依
生養死葬彥力任之嘉慶十八年饑族人名惠宗
賢無以爲生彥並收養已家且出貲爲名惠置宅
與宗賢聘王姓女配焉

姚逢唐監生性友愛其姊夫故子幼家貧唐出貲
爲置地十七畝養之

齊元炳慮長兄食指衆割已田二十畝益之嘉慶
癸酉施粟濟飢破產七十餘畝里隣賴以全活

王興宗監生嘉慶癸酉歲饑里人有鬻妻者爲出

貲贖之

劉萬倉監生修築州城于本保應出木料盡數代備

蘇致遠伯仲析居以田宅之美者讓厥兄族黨有不能婚塋者出貲助之

王秀生幼業儒家頗充裕歲凶計鄉之貧者比戶給穀數斗積糧盡散

祝秉忠有族人元興死無子遺產值二百餘金應屬忠忠辭給遠族之貧者使奉祀爲生計

寇仔精醫理嘗過廟旁聞哭聲入視乃老夫婦攜一幼子病臥其中遂以良劑投之並約近廟五六家補助米麪月餘愈給以路費去

王慶寇字同人父潔歲貢生文章品行增重一時學者稱爲青蓮先生同人恪守庭訓飛聲黌序有父風焉且貧而好義其疎族中叔祖母汪氏及孀母汪氏青年失所天守志而艱於資竭力經紀其家俾克各完乃節硯友羅君愛素清貧因歲饑疫作祖孫父子相繼沒遺孀婦幼女無能營葬倡義

勸助爲之築埋四喪壽躋九十七歲安坐而逝人咸謂盛德所致云

楊瑞設酒肆官道旁唐縣王懋昭過其處遺金數十兩瑞收藏俟其來還之懋昭贈以匾曰拾金不昧

史秀堂州同繁城鎮北舊有石橋一座二十餘空名曰大通傾圯都盡道光十八年秀堂倡義重修劉紹朱家貧性質直晨起赴市拾錢票三張計錢七百九十五千後數日訪知爲史秀堂所失紹朱

以原票還之

趙來安庠生精醫理不受謝貧者並施藥濟之從堂弟龍章數歲喪父貧無以自存來安約族衆歲助錢數千而已更加厚焉

孔傳璽居近官道有陽城人李珠染病委頓於塗璽扶至家調治兩月餘愈贈以路費送之歸

劉恕監生值歲凶有丁興者幼孤餓幾死恕收養之及長爲之定婚送歸其宗

葛元士董珣趙端儒皆慨焚債券一念近仁者

鄭克端道光六年漁於河橋拾金不昧

張丙臨監生修復村西圯橋道光七年六月大水
齧橋東偏復庀石補之

李斌嘉慶癸酉歲饑姪復得地二十餘畝宅一區
售於人斌聞爲出貲贖之

杜錦堂傭工自給於路拾遺金八十兩餘物稱是
錦堂坐守以待久之沈村東李乙踉蹌至言與所
遺符錦卽以授之李叩其姓字錦堂曰困爲人役
利且不愛何有於名竟不以告

呂振國郡庠生監修州城倡首捐貲州牧羅以好義足風額其門居鄉忠厚和平解衣推食人咸德之一時婦人女子田父野老無不稱爲呂善人

孫天才創立義學置田爲師俸族黨子弟來學者甚衆有貧不能自養者更助之膏火天才年逾八旬猶健人謂天之報施善人洵不爽也

孫蘭有鄉人負官稅將鬻妻子以償蘭聞其事卽代爲交納俾其妻子得完聚

鄭建欽獨修小濟水再見處石橋一座

黃學曾性友愛與堂弟析居讓以貲財八百餘千
王承緒乾隆丁丑歲饑于里中人各增糧一斗衣
一件全活甚衆

伊繹尹嘗施舍棺木減價出糧親鄰共欠租三百
餘石銀四百餘兩尹盡焚其券鄉人義之爲立石
道旁誌焉

于秉丙家小豐眷屬無多粟有餘卽分給里黨乾
隆丙午歲祲出粟濟饑

孔傳程獨力重修王公橋一座

周克讓監生道光六年捐入義學地四十畝錢二百千議叙准八品頂帶

劉禹臣監生道光七年捐建阜民保社學名曰英華輸地百畝給脩脯議叙鹽運司知事職銜

孫體欽甘肅西寧府撫番通判嘉楹長子於道光七年輸義學地一頃十四畝議叙鹽運司知事職銜
史錦堂庠生道光七年於本村設立思誠書院捐地七十二畝錢百千十二年州牧改建試院復捐錢一百千議叙准八品頂帶

顏秀芳庠生道光七年捐銀一千兩助城內義學
費議叙加鹽知事銜

孫良鵬守備道光七年輸義學地六十三畝議叙
加級鵬堂叔監生嘉銓亦輸地二十餘畝准八品
頂帶

任洪顯監生康熙中出糧五百餘石鄭則定出粟
五十石郭玉生監生乾隆中出粟一百石王治臣
出粟一百石馬玉輅張孔傳各出粟五十餘石王
治山出粟四十石李珍暨弟璞出粟五十石趙祥

監生嘉慶中出粟五十餘石趙坤戊監生出粟三十餘石助賑鄉人咸賴焉此好行其德量力爲善備著之以愧世之坐擁厚貲視里黨生死漠不關心者

宋大經從國良各輸義學錢二百千岳文淵輸義學田七畝錢五十千李德化輸義學田二十畝蕭克仁輸義學田十三畝信大榮輸義學田二十畝信繼孝輸義學田十畝艾奇峯輸義學田十四畝艾蔚發輸義學田十八畝李太勲輸市宅一處設

立義學此皆誼周閭塾惠深寒畯助作人之雅馴
耆民孫書林捐輸義學地九畝餘

宋天福慮白馬坡十餘里無村墮每夏有渴死者
因結茅甃井施茶其間孔傳松築亭草店舖施茶
吳夢賢亦置義地一區施茶監生俎伯安蕭克繼
監生于介皆施茶數十年此雖善之小者而溥暑
薰蒸驟把瓢勺雖飲瓊漿不啻也

韓四林州監生事繼曾祖母李極孝李病劇請減
算以益曾祖母施醫藥力行善事子文標亦孝謹

好義逆旅聞隣婦哭甚哀蓋將粥婦以償債者解
囊捐萬錢以畱之子振清入庠

李璽長葛人性好推解助婚賑乏施棺藥修橋梁
新廟宇邑有達汴路炎夏設茶以濟行人子守先
太學建茶亭捐田十畝邑令申匾於亭邑人碑諸
石孫萬軸中丁酉副車

隱逸

唐許由隱者堯以天下讓由由不受隱於箕山以手
捧水飲之人遺一瓢得以取飲飲訖挂於樹上風

吹歷歷作聲由以爲煩遂去之

周長沮桀溺郕城人耦耕於鐵梨河有碑記可考

宋杜生者潁昌人也不知其名人呼爲杜五郎所居去縣三十里有屋兩間與子並居前有空地丈餘卽爲籬門生不出門者三十年黎陽尉孫軫訪之其人頗灑落自陳村人無所能官人何爲見顧軫問所以不出門之故笑曰以告者過也指門外一桑曰憶十五年前納涼其下何謂不出問治生曰昔有田與兄並耕侄娶婦度耕不足盡與兄攜妻

子至此借屋居之惟與人擇日賣藥以給飡粥見
憐者與田三十畝食頗足而擇日賣藥一切不爲
日端坐耳問觀書否曰昔曾有一書策無題號其
間多說浮名經當時極愛其議論今忘之并書亦
不知何所矣時盛寒布袍草履室中枵然而氣韻
閑曠言詞精簡蓋有道之士也軫嗟嘆畱連久之
乃去

王忠民潁陽人幼通經史靖康間數言邊方利害
於朝累召弗至值國難隱居不出諸鎮翟興等欲

致弗能皆重之建炎中張浚薦授迪功郎亦不受
後避地南下遇商虢鎮撫董先於內鄉畱軍中事
以師禮嘗作九思圖及定亂四象乞還二帝因劉
豫以達於金主爲鏤板印圖散於僞境以明天下
大義紹興三年翟琮薦其忠節授宣教郎詔先津
遣詣闕旣至呂頤浩徐俯見之皆拜舍於政府懇
辭所授官言臣憤金人無道故三上事本心報國
非冀名祿不許乃以誥寘櫝中藏七寶山下力求
去復依先軍中不出而卒

明谷之東字汾陽弱冠領鄉薦博極羣書邃於名理
昕夕講學布衣蔬食晏如也嘗抱幼子在門人不
知其爲之東也易之之東亦恬然畧不爲意性至
狷潔一介不苟取於縣父母終其身無一干請高
密張侯見其茅屋數椽不蔽風日爲之築室以居
潁濱宋子嘗謂翰如之和汾陽之介潁水之上有
兩異人焉信哉

辛灝襄城人以親老辭舉子業隱於山引流種樹
足跡不入城市邵文莊公守許欲以文學推轂灝

力辭之

花隱王玉璣者字標五其先許人居長葛石固鎮
家世耕讀璣生有異質少補博士弟子員尚氣節
重然諾人以此稱之明季羣盜蜂起與鄉人結寨
固守散資財以贍貧乏率子弟晝夜巡驚寇莫能
攻及汴城破賊四出剽掠知璣名欲羅致爲用脫
身走河北賊劫其妻李氏以搆璣李氏罵賊死賊
并磔其二子事平歸家築園於其鄉爲棲息地性
愛牡丹於幽壙處栽植萬株花隱其自號也壽百

歲子七人皆庠生長之珍能世其業

王大章號東塢鄆庠生居家以孝聞爲親廬墓負土成高阜特立獨行嘗詣闕上安邊策不報辭祿養恬旣老訪友於楚中竟客死

方伎

漢劉諷字偉節潁川人也師司馬季主服日月精華得道後歸鄉里託形杖履而去真誥云潁川劉偉惠漢景帝時公車司馬劉諷也事司馬季主爲入室弟子道成晚歸鄉里託形杖履身死桑樹之下

今墓在汝南安成縣

劉根潁川人能令人見鬼隱於嵩山或云劉根常服棗核中仁百邪疾不復干皮日休與毛公泉詩有劉根昔成道茲塢四百年云又南嶽總勝集云劉根先生修大洞帝乙之道遊宦四方爲政有德晚歸南嶽之東峯煉真朝斗服氣而元化

劉德昇字君嗣潁川人始作行書卽正書之小變務從簡易相間流行故曰行鍾繇謂之行稗蓋自隸法掃地而眞幾於拘草幾於放介於兩間者行

書有焉不真不草是也於是兼真則謂之真行兼草則謂之草行劉德昇則行書之祖也又璿珞篆亦德昇觀星象而作

三國魏鍾繇字元常潁川長社人祖皓至德高世父廸黨錮不仕繇善書師曹喜蔡邕劉德昇真書絕世剛柔備焉點畫之間多有異趣可謂幽深無際古雅有餘秦漢以來一人而已雖古之善政遺愛結於人心未足多也尚德哉若人其行書則羲之獻之之亞草書則衛索之下八分則有魏受禪碑

稱此爲最繇隸行入神八分入妙法書要錄載張懷瓘書斷如此而宣和書譜云繇初學蔡邕筆法於韋誕誕秘而不傳輒搥胸嘔血幾至於斃魏太祖以五靈丹救之得活及誕死繇盜發其塚遂得邕法於是學書益進雖窮晝夜無少間輟臥則以手畫被被爲之穿若魏受禪碑劉禹錫言王朗爲文梁鵠作字鍾繇刻石遂爲三絕則繇潛心字畫可知矣世以繇正隸如郊廟旣陳俎豆斯在梁武帝亦謂如雲鶴遊天羣鴻戲海豈虛語哉繇晚病

滕每許以乘車趨朝後三公有疾遂以爲故事當時爲之榮今御府所藏正書一賀剋捷表

鍾會元常少子書有父風稍備筋骨美兼行草尤工隸書遂逸致飄然有凌雲之致亦所謂劍則干將莫耶焉會嘗詐爲荀勗書就勗母鍾夫人取寶劍會兄弟以千萬造宅未移居勗乃潛畫元常形像會兄弟入見便大感慟勗畫亦會之類也會隸行草俱入妙

關杞杞潁川人善書與鍾繇孫子荆同時議用筆

事

許慎字叔重召陵人少好古學書正文字尤善小篆師模李斯甚得其妙作說文解字十四篇萬五百餘字書列能品

南北朝宋庾嘉德最善於筮蔡之事有人失一婢庾卦云君可出東陵口伺候有姓曹乘車者無論識否但就其載得與不得殆一理也旦出郭果有曹郎上墓徑便升車曹大駭呼生驚奔入草刺一死屍下視乃其婢也

南北朝魏庾導潁川人與夏侯道遷俱入魏雖不叅
謀亦爲奇士歷覽史傳善草隸書輕財重義仕梁
右中郎助戍漢中及至洛陽環堵潁廬多與攜秀
交舊積二十餘歲殊無宦情正安中乃除幽州左
將軍府主簿饒安令罷縣後仍客遊齊魯之間

唐張憬藏長社人善相術與袁天綱齊名魏元忠少
時見憬藏問之不答元忠怒曰窮通有命何與君
耶拂衣去憬藏遽起曰卿之相在怒時位必卿相
姚崇李迥秀杜景佺俱從之遊憬藏曰三人皆宰

相然姚崇最貴既而果然

杜生者許州人善易卜有亡奴者問所從追戒曰
自此行逢使者懇丐其鞭若不可則以情告其人
果值使者於道如生語使者異之曰去鞭吾何以
策馬可折道旁蓼代之乃往折見道旁亡奴伏其
下獲之他日又有亡奴者生戒持錢五百伺於道
見進鵓者市其一必得奴俄而使至其人以情告
使者以一與之鵓飛集灌莽上往取之而得亡奴
衆以爲神

吳道元字道子窮丹青之妙明皇知其名召入供奉嘗畫兩都寺觀墻壁四十餘門景雲寺老僧云吳生畫此寺地獄變相時京師屠沽漁罟之輩見之而懼罪改業率皆修善杜詩云畫手看前輩吳生遠擅長東坡觀道子畫壁有云筆所未到氣已吞原籍陽翟人後寓許州今城西北二里猶有吳道子洞存焉

韓滉法書要錄稱其委質慮遠推誠道博歷代名畫記稱其工隸書章草雜畫頗得形似牛羊最佳

戴嵩畫水牛卽師滉宣和畫譜謂滉好鼓琴書得
張顛筆法畫與宗人韓幹相埒其畫人物牛馬尤
工昔人謂牛馬目前近習狀最難似滉落筆絕人
然世罕得之滉嘗言不能定筆不可論書畫今御
府所藏李德裕見客村夫子移居等圖三十有六
滉潁川人字太冲歷同平章事封晉國公諡忠肅
按三書載滉歷官惟要錄只署給事中餘二書詳
畧互異

後唐陳閔潁川人陳王府長史與天水趙徽明或志
敦習學或自悅古能習玩之無數也

宋楚芝蘭襄邑人初習三禮遇道人教以符天六壬遁甲之術詣闕自薦屢占侯有據特遷員外賜五品服

陳用志潁川鄆城人居小窰因而時人皆呼爲小窰陳初爲圖畫院祇候已而告歸於家在鄉里中工畫道釋人馬山林等雖詳悉精微但疎放全少而拘制頗嚴故求之於規矩之外無飄逸處也大抵所學不能恢廓耳今御府所藏一秋山圖宣和畫譜所載如是而郭若虛圖畫見聞誌則以用志

爲用智有功德蕃馬故事人物等傳於世注云用
志居小窰鎮多謂之小窰陳鄧椿又以用志爲用
之注曰予按存中筆談故錄用之而郭記亦有小
窰陳名用智豈用之耶又云用之居小窰村善山
水宋復古見其畫曰此畫信工但少天趣耳先當
求一敗墻張絹素倚之墻上朝夕觀之旣久見敗
墻之上高平曲折皆成山林之勢心存目想神領
意造則隨意命筆自然景皆天造不類人爲是爲
活筆用之感悟格遂進

董贊潁川長社人工畫山水寒林學志精勤毫鋒老硬但器類近俗格致非高

蘇過東坡季子善作怪石叢篠咄咄逼人翁坡有觀過所作石竹三絕以爲能爲竹寫真小坡解與竹傳神者是也晁以道亦云書畫之勝亦克肖似其先人又時出新意作山水遠水多紋依巖多屋木皆人跡絕處并以焦墨爲之此出奇也

范正夫字子立潁昌人文正公之諸孫德孺之子也長於水墨雜畫標格高秀予家與之同居潁水

多藏其得意之作如訪戴圖春令圖寄興清遠眞
士人筆也惜乎以名家高才而知鳳翔還鄉適虜
人屠城死之鄧椿畫繼按文內云予家與之同居
潁水則椿亦當係許州人

王穀字正叔潁川郾城人有吏才於儒學之外又
寓興丹青多取今昔人詩詞中意趣寫而爲圖繪
故鋪張布置率皆瀟灑居郾城邑之南城有小亭
下臨潁水榜曰潁景亭南通淮蔡北望箕潁川原
明秀甚類江鄉吳處厚有詩云亂鶯啼處柳飛花

拍拍春流漲曉沙正是江南梅子熟年年離恨寄
天涯穀常遊其上得趣甚多時發其妙於筆端耳
穀頃佐京尹後又爲大理卿今御府所藏洞庭曉
照圖一雪晴漁浦圖一雪江旅思圖一

金麻九疇字知幾初名純其先易州人後遷於許州
之鄆城幼穎悟七歲能草書作大字有及數尺者
由太常寺太祝遷應奉翰林文字

元滑壽襄城人博通儒書尤精於醫至元間全活爲
多所著有難經本義行於世

國朝乾隆中采入四庫總目云壽世爲襄城大家

明賈誌臨潁人繪山水人物咸有幽趣尤善寫真弟謙能傳兄業而畧變其法古今名畫一過目輒能臨之唐王嘗謂曰汝畫家之奇童也早夭

安肅臨潁人善醫應手立效成化中入太醫院

曹義襄城人善醫治病不受謝嘗有盜入室執之則素識者義曰汝何爲是縱之去人稱長者

何大川襄城人善算雖兩目失明而布算不廢又善星命言禍福皆驗

司恭儒醫治人多效久寓大梁遂家焉

李紹襄城人通星歷推步之術正統間授欽天監
監正

顏守正襄城儒醫於小兒科尤精不計利且善丹
青頗知吟咏

陳亮工襄城人精於醫子瑄繼父業起人沉疴貧
不計利

車明興號堃雲幼聰慧善圖山水人物名聞海內
惟未見南方水牛一日裹糧往觀已而寫風雨閑

忙四景遍肖焉又有百牛圖世傳以爲至寶興生甫一月卽能言嘗自稱爲呂紀後身其畫不假師授盡得之天性云二子寵富俱中正德癸酉鄉試列科目

國朝宋馬字秦章康熙時廩生性傲岸工書草法尤善獨創一體不爲前輩大家所囿但不輕書故其字至今僅有存者馬許州人

王治安字輔九許州人風姿瀟灑望之若神仙中客嗜酒工書尤精繪事然性孤介寡合貴重不肯

多寫故其書畫少見於世人但得其贗本聊拱璧
珍之或謂輔九蓋道子後身其喪也羿其棺若無
物然意尸解與素與明經吳雨章特稱莫逆雨章
輓之以詩有曰名豈丹青著客真鸞鳳儔又曰魂
返欲飛鶴書存尙換鶩其文采風流可想見矣

流寓

南北朝魏王由好學有文才尤善草隸性方厚有名
士之風又工摹畫罷東郡太守寓居潁川死於亂
兵名流悼惜

唐陳夷行字道周其先江左人世客潁川由進士第累官尚書左僕射時楊嗣復李珣相次輔政夷行介特雅不與合深爲主知以足疾乞身罷爲太子太保以檢校司空爲河東節度使

宋楊億字大年建州浦城人七歲能爲文對客談論有老成風年十一太宗詔試詩賦五篇下筆立成太宗深加賞異授秘書正字特賜袍笏俄丁外艱服除會從祖徽之知許州億往依焉務學晝夜不息徽之間與語嘆曰興吾門者在汝矣億後至翰

林學士遂家潁川

范純仁與弟純禮尚書右丞純粹戶部侍郎兄弟並居於許純仁字正平學行甚高爲開封尉蔡京誤以罪謫象州會赦歸潁昌正平退閑久益工詩尤長五言著荀里退居編以壽終

歐陽修字永叔廬陵人寓居襄城景祐元年爲西京畱守推官秩滿歸襄城有罷官初還襄城敝居詩寶元二年梅聖俞宰襄城公自乾德入襄城又有還襄城敝居詩仕至觀文殿大學士太子少保

謚文忠

蘇轍字子由眉山人元祐間歸自嶺海崇寧中降
朝請大夫罷嗣居許州築室於許號穎濱遺老又
號欒城兄軾字子瞻號東坡居士亦嘗寓穎昌

程顥字伯淳號明道弟頤字正叔號伊川二程俱
河南洛陽人顥以御史言新法失職後起知扶溝
縣與頤奉其父珦皆往及任滿韓維兄弟招延之
舉家寓穎昌上蔡謝良佐建安游酢林大節缺南
楊時皆嘗至穎昌從二程學

范鎮字景仁成都華陽人舉進士神宗朝言新法
詆安石以戶部侍郎致仕徙居許哲宗卽位起爲
端明殿學士復告老致仕封蜀郡公年八十一歲
薨諡忠文

蘇過子瞻季子塋父於汝州郊縣小蛾眉山遂家
潁昌府營臺湖陰水竹數畝名小斜川號斜川居
士時人以其文幾父東坡故稱小東坡後與叔子
由同居許下代有傳人金之蘇宗之明之蘇太常
與朝之明經進士蘇羽宸蘇濟世皆其後裔

李廌字方叔其先自鄆徙華廌少以學問稱謁蘇軾於黃州軾稱其才爲萬人敵軾卒廌哭之慟曰吾愧不能死知己至於師事之勤渠敢以生死爲間卽走許汝間相地卜兆授其子作文祭之日皇天后土鑒一生忠義之心名山大川還萬古英靈之氣詞語奇壯讀者心悚中年絕進取意謂潁爲人物淵藪始定居長社縣令季佐及里人買宅處之

韓億字宗魏常山人以文學起家致位政府始塋

其父贈太師開府儀同三司陳國公保樞於潁昌府之長社縣遂爲潁昌人卒謚忠憲子八人一爲宰相一爲門下侍郎一知制誥餘皆貴顯世以此荀氏八龍云

趙宏偉字子英甘陵人後徙潁川至元十三年元兵攻宋宏偉以書謁元帥宋都解於軍中奇之俾以兵畧地臨江至吉州宋主將管忠節路分鄒超悉衆出戰宏偉敗之追北二十餘里薄其城示以禍福知州周天驥以城降仕至內臺都事浙東廉

詐以雄飛及李氏爲家人由是獲全遂徙朔方至
元二年世祖召見陳當世之務世祖大悅授同知
平陽路轉運司事後爲燕南河北道宣慰使決壅
滯黜姦貪政化大行卒於官

元楊果字正卿祁州蒲陰人幼失怙恃自宋遷亳復
徙居許昌以章句授徒爲業流寓坎坷十餘年金
正大甲申登進士第會叅政李蹊行大司農於許
果以詩送之蹊大稱賞歸言於朝用爲偃師令到
官以廉幹稱元世祖中統二年拜叅知政事後以

老致政卒於家年七十五諡文獻果性聰敏美風
姿工文章尤長於樂府外若沉默內懷智用善諧
謔聞者絕倒微時避亂河南娶羈旅中女後登科
歷顯仕竟與偕老不易其初心人以是稱之有西
安集行於世

元好問字裕之號遺山山西秀容人七歲能詩十
四從陵川郝晉卿學不事舉業淹貫經傳百家六
年而業成爲箕山琴堂等詩禮部趙秉文見之以
爲近代無此作也於是名震京師天興中爲行尚

書省左司員外郎自興定間多寓鄆城與麻知幾
倡和

明袁汝楫武定州貢生因宦入籍於襄城後仕至岳
陽令子國觀入庠曾修邑乘

陳以聞字石泓湖廣麻城人遊寓於鄆之洄曲往
來林溪間長嘯自適人莫能喻後登萬歷丁未進
士爲刑部侍郎

張銑字公謹直隸蠡縣人永樂間由生員守城有
功授陝西盤屋縣丞後因事左遷長葛典史以疾

卒於官正統間遇例附籍焉孫綸字獻經中順天
己卯鄉試任直隸鹽城訓導遇艱復補陝西慶陽
府學訓導九年滿陞山西樂平教諭再轉豐縣所
至嚴立教條善於啓迪生徒多所造就宏治年間
致仕

陳緣交趾利仁州人由歲貢授新鄭訓導陞長葛
教諭正統間以遠方得占籍焉長子佐由歲貢任
湖廣副審理次子佑中成化戊子鄉試

宮默字長白涪川明經負盛名交遊半天下少保

高公以舊識延至襄爲幕賓因家居焉每征討多
賴其籌畫兵民德之

